



Bentiaraq Ottosen

UPA 2026/151-1

Atassut

13. Maj 2026

**Meerarsiat meeqqat allat assigalugit feriarnissaminnut, ilaqtariittullu inuunissaminnut periarfissaqarnissaat qanoq sulissutigisinnaaneripput pillugu, apeqquteqaat aallaavigalugu oqallinnissamik siunnersuut**

(Inatsisartunut ilaasortaq Pipaluk Olsen, Demokraatit)

Atassummiit qutsavigiumavarput Inatsisartunut ilaasortaq Pipaluk Olsen-i apeqquteqaat aallaavigalugu oqallinnissamut siunnersuusiarisimasaanut pingaarutilimmut qulequttamut inuppalaassuseqartumut. Aammalu manna iluatsillugu qujaffigerusullutigit Nunatsinni angajoqqaarsiaasartorpasuit, akisussaaffimmik annertuumik tigummisarmata namminerlu angerlarsimaffimminnut meeqqat pisariaqartitsisut ammaattarmatikkit, toqqissisimanermik sinaakkutinik aammalu isumassorneqarnissamik pisariaqartitsiffianni.

Atassut isumaqataavoq sinaakkutit pitsaasut aalajangiisuusartut meerarsiat pitsaasumik atassuteqaateqalernerannut, ataatsimut misigisaqaqatigiittarneq soorlu eqqarsaatigalugu, soorlu feeriarluni angalaqatigiinneq pitsaasumik isumaqarsinnaasartuq. Saniatigit isumaqarpugut pingaaruteqartoq aamma tigummiinnassallugu, meeraq qitiutinneqassammat. Meeqqat assigiinngitsuupput, aammalu assigiinngitsumik pisariaqartitsisarput apeqqutaallutik sorpassuit. Taamaammat aalajagiinerit feriernertut ittut isumaginninnikkut ilisimasalinnik suliaqartunik tigussaasumik nalilersuiffigineqartarnissaat meeqqat ataasiakkaat qitiutillugit pisariaqartitai aallaavigalugit pingaaruteqartoq isumaqarfigaarput.

Atassummiit isumaqarpugut oqallinneq siammassinnerusumik ingerlanneratigit kivinneqarsinnaangaluartoq qaffasinnerusumik. Ferietut ittut kisiisa ukkassiffiginagit atungassarititaasut sinaakkutillu angajoqqaarsianut ataatsimut isiginiartariaqaraluarpavut. Aningaasaqarnermut attuumassuteqarlunilu isumaginninnikkut attuumassutilinnik imaqarmat sammisaq, taamaalilluta qulakkeerniassangaluaratsigu atungassarititaasut pitsanngorsarsinnaanissaat angajoqqaarsiaasartut suliassaminnik kivitsinissaannut oqilisaasinnaajumallugit.

Atassummiit pitsaasutut isigaarput Naalakkersuisut Kommuninut oqaloqatiginninniarnert, aammalu suleriaqqittoqarniarnera angajoqqaarsiaasartunut atungassarititaasut pitsanngorsarumallugit. Kaammattuutigaarput tamakkiinnerusumik isigaluni suleriaqqinnissat ingerlanneqassasut, ilaatigit misissuisoqarnissaa aammalu ineriartortitsilluni suliaqartoqarsinnaanissaanut toqqammaviliilluni pilersitsinissap anguniarneqarnissaa.



Taamatut toqgammavilersuuteqarluta Atassummiit ataatsimiititaliamut susassaqartumut  
qulequttap ingerlatinneqarnissaa innersuussutigaarput.

Qujanaq.